



Go samagana le matsapa a *Covid*

African Storybook
Tawanda Mhandu





Dikolo di ne di tswetswe dikgwedi tse dintsi ka lebaka la paka ya bosetšhaba ya thibelonakwana ya go se tswele kwa ntle. Paka ya thibelonakwana ya go se tswele kwa ntle e ne e le go diegisa go anama ga *Covid-19*.

Dikolo di butswa gape beke e e fetileng. Barutwana ba bangwe ba sa ntse ba dutse kwa gae.

Kwa sekolong sa sekolopotlana sa Maxeke, ke nako ya thuto ya Dikgono tsa Botshelo.



Morutabana Piti o batla go itse gore barutwana ba samagane jang le matsapa a mo pakeng ya thibelonakwana ya go se tswele kwa ntle.

“Ke batla go utlwa ka maikutlo a lona ka nako ya paka ya thibelonakwana ya go se tswele kwa ntle,” o ne a bolelela barutwana jalo.

Sello a simolola, “Rre o dumela gore mongwe le mongwe o tshwanetse go nna le tema e e rulaganeng.”



“Ka jalo, o re tsosa moso le moso go tloga Mosupologo go fitlha Labotlhano, a batla gore re dire sengwe se se mosola go tloga 8 mesong go ya 2 thapama,” Sello a tthalosa.

Munya a botsa, “Go kaya eng, ‘sengwe se se mosola?’”

“Ke go dira se se tlokegang se le botlhokwa,” Sello a araba.



“Ee Sello, o nepile,” ga bua Morutabana Piti.

Mogoloa wa ga Sello a tlaletsa, “Rre o netefaditse gore paka ya thibelonakwana ya go se tswele kwa ntle e nna fela jaaka nako ya sekolo.”

Neo a re, “Selo se le sengwe fela se ke se ratileng thata ka paka ya thibelonakwana ya go se tswele kwa ntle ke gore re dirile ditirwana tse dintsi mmogo re le balelapa.”



Munya a re, “Ke dumela gore ke dirisitse nako ya me sentle. Ke ithutile Dipalo gore ke tle ke tokafatse maduo a me.

Ke bogetse ditshwantsho tsa thelebišene, ka tshameka metshamekonyana ya go iketla ka kwa ntle. Gape ke buisitse, go tsamaisa nako.

Ke ne ka itshidilola gore ke nne ke itekanetse.”



Basani a re, “Malebana le paka ya thibelonakwana ya go se tswele kwa ntle, ke nagana gore go ne go na le molemo le bosula.”

“Bonnete ba molemo ke gore ke nnile le nako ya go ikhutsa, le nako e ntle le balelapa. Ke dirisitse nako go buisa dibuka le go boeletsa tiro ya sekolo,” a tthalosa.



A tswelela, "Ke ne ke tshwenyegile gore a bathusi ba magae ba tla amogela tuelo ya bona.

Ke nnile le go tshwenyega ka balelapa le ka batho ba ba tswelelang go tlola molao."

Morutabana Piti a koba. O itse gore ka nako ya paka ya thibelonakwana ya go se tswele kwa ntle, go ne go le bonolo go ikutlwa o etseetsega e bile o tlhobaela.



Yash a re, “Re barataro mo lelapeng la rona. Le fa ke rata balelapa la me, fa ke ntse le bona gantsi, ke tlhakana tlhogo.

Go rarabolola mathata a, mme o ntheketse motshameko wa *Monopoly*. E ne e le motshameko o ke o ratang thata wa boto fa ke le monnye.”



Yash a konosetsa, "Ke ntse ke tshameka *Monopoly* thata mo dibekeng di le mmalwa tse di fetileng, ebile ke nagana tiro ya thekiso ya matlo!"

Amanda a tshega ka gore, "Se ke dirileng go samagana le matsapa a mo pakeng ya thibelonakwana ya go se tswele kwa ntle e ne e le go apaya le go baka. Tota ke ne ke tlhoafaletse sekolo."

Barutwana ba bantsi ba a dumela.



Morutabana Piti a re, “Go a thusa go bua le mongwe yo o mo tshepang ka moo o ikutlwang ka teng.

Gompieno ke utlwile ka dintlha tse di siameng tsa gore o ka samagana jang le matsapa fa botshelo bo na le dikgwetlho.

A re tsweleng go bua ka se kamoso,” Morutabana Piti a bua jalo fa tshipi e lela.

—Dipotso

1. Kwala bokao jwa mafoko a: go samagana le matsapa, go nna le dikgwetlho, tlhobaela, tema e e rulaganeng.
2. Kwala malatodi a mafoko a.
3. Tlhalosa motlae wa ga Yash.
4. Ke dikakanyo dife di le tharo tsa gore o ka samagana jang le matsapa fa botshelo bo na le dikgwetlho.
5. A o dumelana le Basani? Tlhalosa karabo ya gago.
6. A o nagana gore taolelometsamao e fokoditse go anama ga *Covid-19*? Tlhalosa karabo ya gago.
7. Morutabana Piti a re, "Go mosola go bua le mongwe yo re mo tshepang ka ga moo re ikutlwang ka teng." Ke dilo dife tse o buang ka tsone le mongwe yo o mo tshepang?
8. Bokao jwa 'go belaela'? O nagana gore ke goreng go ne go le bonolo mo bathong go belaela ka nako ya *Covid*?

Bukakanelo e ikaegile mo dipegelong tsa RX Radio. RX Radio ke seteišene sa radio ya bana ya inthanete, e dirilwe ke bana e bile e diretswe bana.

RX Radio e gasa go tswa mo Red Cross War Memorial Children's Hospital kwa Motse Kapa.

RX Radio e thusa bana go bua dikgang tsa matsapa a botlhokwa go bona.

[Etela RX Radio](#)



Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).



basic education

Department:
Basic Education
REPUBLIC OF SOUTH AFRICA

*The Ulwazi Lwethu readers and storybooks have
been quality assured and approved by DBE.*

Your attribution should include the following:

Title: Go samagana le matsapa a Covid

Author/s: African Storybook

Translator/s: Dineo Moatshe

Illustrator/s: Tawanda Mhandu

Assurer/s: Opelo Thole

Language: Setswana



© Zenex Foundation - Saide 2025 (Updated Edition)

CC BY includes the following elements:

BY  – Credit must be given to the creator

